

Соколёнок

5/2016

сентябрь - октябрь



Лашын



БАЛАЛАР УЎШИН ЭКИ АЙДА БИР КЕРЕ ШЫГАТАГАН РЕСПУБЛИКАЛЫК ЖУРНАЛЫ



РОССИЯДЫНЪ БАЪТИРИ АТЫ ТАТЫЛГАН

Дагыстаннынъ Сергокала районынынъ Сергокала авылыннан эки шакырым ертеги орманлыкта доьрт боевиклер тыншайып туратаган аьдемлер куьбине янасадылар. 23 ясындагы яс аьдемге карап от шыгаратаган савыттан атадылар. Яраланган аьдем еринде ок оьледи. Оннан олар авыр аьлге калган доьрт аьдемди байлайдылар, олардынъ «Мерседес» автомашинасын аладылар. Ол да сол аьдемлердинъ биревиндики болган экен. Байланган яс аьдемлердинъ бирисинде МВД куллыкшысы экенине шайытламасы болган. Кыянатшылардынъ бириси сол аьдемге камерага карап оьз коллегаларына эм досларына ыхтыяр саклав органларынан кетпеге деп айт деп талап салады. Полиция куллыкшысы камерага карап булай деген: «Куллык этинъиз, кардашлар». Оннан сонъ бандитлер оны атып оьлтиредилер.

Эки боевик, сонынъ ишинде Избербаш бандкуьбининъ басы Халимбеков, Нурбагандовты оьлтируувге катнасла болган, Махачкала каласында айырым операция вакытында йок этилинген. Тагы да эки боевикти куьшлилик куллыкшылары Избербашта 9 сентябрь куьн тутканлар.

Нурбагандов оьзин баьтир офицер этип коьрсеткен. Дайымга присягасына эм Эли алдында борышына алал болган. РФ-сынынъ Президенти В. Путин Нурбагандовка Россиядынъ Баьтири атын таккан (оьлгеннен сонъ).

Россиядынъ Баьтири деген орденди Президент баьтирдинъ атасы ман анасына Кремльде тапшырган.

Дагыстаншылар оьзининъ баьтир улы ман оьктем болады эм онынъ йигитлиги калганларга дайымга ийги коьрим болып турар эм турмага керек.



Янъы окув йылы ман!

АЯВЛЫ БАЛАЛАР!

Биринши сентябрь – янъы окув йылы басланатаган, сизинъ яшавынъызда энъ де куванышлы эм умытылмас куьни. Сол куьн бизим наьсипли элде тувган миллионлаган балалар яйлык каникулларыннан сонъ янъыдан йыйыладылар. Сол уллы байрам куьнге айланады. Байрам болмайма, бир-биревге айтпага коьп янъылыклар болса, уьш айдан сонъ бири-бирин сагынган балалар эм окытувшылар йолыгатаган болса!

Каникуллардынъ вакытысында

сиз, балалар, хыйлыга оьскенсиз, ийги ял алгансыз, куллыкта шыныккансыз, экскурсияларга баргансыз, коьп яхшы оьзгерислерининъ ортакшылары болгансыз. Оьзлерине янъы ети йыл битетаган кишкентайлар болса буьгуьн яшавында бириншилей мектебинъ босагасына, билимлердинъ дуныясына абыт басадылар, агаларынынъ эм аьптелерининъ туткан йоллары ман сенимли кепте юрмеге баслайдылар. Олардынъ ойлары болса, буьгуьн мектебке кеткенше уьйде-



ги озлеринынъ ойннышыкларынан, бир неше сабатке сама айырылмага суймейдилер:

– Мектебке бармага
Кеш каласынъ, ай сен, кыз!
– Мен кетсем мектебиме,
Кувыршак кала ялгыз...

Адетке кирип калган кепте, биринши сентябрьдеги биринши дерис – татымлыктынъ дериси. Сол дерис дуниядагы баъри уйкенлердинъ де,

балалардынъ да асыл мырадына-татымлыкты яклавга, давсызлыкка карсы юритилетаган зор ислерге багысланады. Балалар, татымлыкты яклавда уйкенлер кимик, сизинъ де аслам пайынъыз барын бир де мутпанъыз.

Уллы орыс язувшысы Максим Горький: «Балалар – яшавдынъ шешекейлери» – деп бек туъз айткан. Шынтылай да, сиз бизим яшавымыздынъ шешекейи, гуъли, уйкен келеектегемиз экенди, сизинъ алдынъызда уллы борышлар токтаганды да бир де мутпанъыз!

Аявлы балалар! Сизинъ баъринъизди де янъы окув йылы ман кутлайман, окувынъызда уйкен уьстинликлер, коьплеген яхшылык, наьсип эм савлык йорайман.

Анвар-Бек Култаев, Ершов атындагы халклар ара адабиат савгасынынъ лауреаты.



Наталья Метелкина

Яй да энди кетеди

Сонъгы кере
Больш турган йылув ман
Яй да бизди
Кувандырып болмайды.
Сисе кимик
Ашык болган булыт та,
Явган ямгыр,
Эскен ел мен ювилды.

Шалайланган
Ак тереклер эндиги,
Эски паркта
Ял алады алгаспай.
Шешекейлер
Аллеядынъ баърисин
Бийлеп алган
Ярасыкка тоялмай...

Пароход та
Йылга бойлап барады,
Газонлардан
Оьленлер бас коьтерген.
Куъз келе деп
Ынанмага болмайды –
Ондай белги
Кобзим аьли сезбеген...



Атамнынъ мырады

«Яс теректи карамасанъ, курып калады», – деп язган М.К.Курманалиев. Ясы уыйкенди де аявламасанъ, сыйламасанъ – йолынъ болмайды. Бизим аьелдинъ оззининъ аьлеметлиги бар. Меним атам кишкей заманда ата–анасыннан эрте калган, детдомда тербияланган. Коьп кыйынлык коьрген. Оззининъ аьр дайым мырады – коьп балалы уйде оьспеге болган. Уыйленип, коьп балаларым болса экен деген ой дайым басында айланган. Аьр кимнинъ ниетине коьре болады. Атам Муталлап пан тетем Шодай ети бала оьстиргенлер: Таждин, Алавдин, Тамара, Салавдин, Гульнара, Саадин, Камаладин. Ашлык йылларда бек кыйналганлар. Оьзлерининъ шыдамлыгы ман, куллык суьерлиги мен баьри затка шыдаганлар. Ашлыктан нешев сисип оьлген, кара халк кырылган. Сол затка ыспатлык тувылма М.Авезовтынъ «Кесек оьтпек» деген ятлавы:

Кумда ятыр кесек оьтпек
Керексиздей кайыры.
Соны коьрди эсли киси,
Энькейди ол коллары.
Бек аявлап, бек баалап,
Алды оьтпек кесегин.
Карт эгинши биле эди,
Ашлык йылдынъ баьлесин.

Атам аьр заман балаларын аьдуьвлеген. Атамнынъ мырады толды деп айтпага эсиме келеди. Оьзи суьйгенлей: ети балады оьстирдилер тетем мен, буьгуьнлерде баьри балалары уйли болганлар. Акие кедеси Камаладин косагы Джанбике мен бес балады тербиялайдылар. Мен тувганда суьйиниши коькке етип, тетем мага атамнынъ атын атаган. Атамызды коьрмеген болсак та, тетей дайым бизге онынъ акында айтады. «Аявлы меним тетем!» – деп куьшли согады юрегим. Меним тетемге аьли сексен уьш яс. Те-

тем дайым бизге коьрим, тирев. Бизим бесевимизди кешелерде янына олтыртып, туьрли хабарлар айтады.

Тетемизди айлак куьшли суьемиз...
Баьримиз уйде бесевмиз.
Тетемиздинъ дайым биз,
Коьнъилин коьтермеге шалысамыз.

Уллы Менандр айткан: Картлыкка куьлме, сен де сога барасынъ! Бизим аьелде тетемиз – сыйлы орында. Тетемнинъ йылы кушагы, анамнынъ саьвле сепкен коьзлери, атамнынъ аьсирет соьзи, уста коллары, бебелеримнинъ саркылдаган куьлкиси – баьри де мага сондай исси, аявлы.

Ялгыз карындасым Маринага баьримиз куьезленемиз. Ойларыма, сувдай таза сыдыралар келедилер:

Карындасым Маринага
Дайым сукланаман.
Уйкен яшавда мен ога,
Тек наьсип сагынаман.


«Артынъа шашкан – алдынъа», деп айтпага суьеди тетем. Эгер мен ясы уйкенди аьруьв сыйласам, картайганда оьзим де сыйлы аьдем боларман, – деген ойга келемен. Балалы уй – базар, баласыз уй – мезар; деп босына айтылмаган. Баьри бесевимиз ата – аналарымызга тирев болармыз деп сенемен. Мен сосы наьсибим уьшин разылыгымды билдирип, сав дуныяды кушаклагым келеди!

Аьелимиз уйкен ди,
Оьктемсиймиз баьримиз.
Болсын дайым коьрим ди,
Авылымызда аьелимиз!

Аблезов М.
Окувши, Батыр-Мурза авылы.







Бобрѝ эм ети улак

(орыс эртегиси)

Бурын заманда бир эшки яшаган бопытты. Эм онынъ ети улагы да болган.

Бир кере ол орманга ашамлыкка бармага суйеди. Обзининъ балаларын шакрыады эм айтады:

– Балаларым-улакларым, уйге биревди де йиберменъиз. Орман бойынша бобрѝ кыдырып юреди. Ол бек аш. Онынъ тавысы каты. Бармаклары десенъ, каралар. Тек мага эсикти ашынъыз. Мен келермен эм йырларман:

– «Балаларым-улакларым, эсикти ашынъыз, сизинъ ананъыз келген. Ашамага аькелген».

Аьне сол заман бобрѝ терезединъ туьбинде турган эм баьрисин де тынълаган эм эситкен. Эм улакларды алдатып, ашамага суйген.

Бираз заман кетеди. Бобрѝ келеди эм эсикти кагады эм улыйды:

– Балаларым-улакларым, эсикти ашынъыз, сизинъ ананъыз келди. Ашамага аькелди!

Улаклар каты сести эситедилер эм анълайдылар. Бу-бобрѝ. Эм эсикти ашпайдылар.

Аьне сол заман бобрѝ саьвдегерге барады эм обзине уйкен кесек сабын алады. Оны ашайды. Эндигиси онынъ сеси бираз юмысак болып шыгады.

Артына кайтады эм эсикке кагады:

– Баларым-улакларым, эсикти ашынъыз, сизинъ ананъыз келген. Ашамага аькелген.

Ама улаклар тагы да бобрѝди йибермейдилер.

Бобрѝ эндигиси темиршиге барады. Эм ол ога янъы тамак ясайды.

Онынъ обзи де коьмек этпейди – улаклар оны уйге йибермейдилер. Неге десе олар онынъ кара бармакларын коьрип каладылар. Болмаганда, бобрѝ обтпек салувшыга барады. Эм ога бармакларыма ун септагы деп тилейди.

Улаклар ак болган бармакларды коьредилер. Юмысак тавысты эситедилер. Анамыз келген экен деп, ойлайдылар. Эм эсикти ашып коьядылар.

Бобрѝ атылып уйге киреди. Улаклар оны коьрип, тыгылып баслайдылар. Янъякка. Болган ман бобрѝ олардынъ баьрисин де табады эм ютып та коьяды. Тек ол кишкей улакты тавып болмайды. Ол болса, саьатлерге кирип тыгылган болган экен.

Бобрѝ тойып ашайды. Курсагын суйпайды. Терек астындагы ясыллыкка аякларын созып ятады. Тыншайды. Сонъ уйклап кетеди.

Тез арада орманлыктан эшки кайтады. Эсикке кагады. Ама ога бирев де явабын бермейди. Ол эндигиси обзининъ балаларын излеп баслайды. Атларын айтады. Кышкырады. Тек кишкей улак обзининъ сесин береди. Эм ол не зат болганын тоькпей-шашпай айтып салады. Олар эндигиси ясыллыкка келедилер. Теректинъ туьбинде бобрѝ ятыр. Каты кепте уйклайды эди. Сондай да каты уйклайды, теректинъ япыраклары шайкаладылар.

Эшки эндигиси бобрѝдинъ карынын аьруьв этип ярады. Баьри де алты улаклары шыгадылар эркинге. Баьри де тирилер! Бобрѝ уйклап турганлай, эшки онынъ карынына коьп дегенде коьп таслар куяды. Эм аста-акырын тигип те алады.

Карындагы таслардан бобрѝдинъ сув ишкиси келди. Эм ол куйыга сувга барды. Энъкейди. Эм авыр таслар оны тоьменге карап тартып алып та кеттилер. Эм ол куйыдынъ ишине кетип те калды. Ютылды. А эшки обзининъ балалары ман суйингеннен, куйыдынъ тоьгергинде бийип те алдылар...

Кобьширген С.Култаева





Калдырайык

Кызын айттырып келгенде Мактанбек кудаларга савбол айтып, кызына тилеек куржын санын коьп этеек болып булай дейди:

– Меним кызым Алтынбийкединъ акында сиз сав авыл айтып эситкен боларсыз. Ол таныслардынъ авызынан туьспейди: коьрмеге аьруьв. Йогары билим алган, кайдай аьруьв исли, меннен де артык акыллы.

Бу соьзлерди эситкен Кожа, ушып орыныннан туьрып:

– Мени кардаш деп санайтаган болсанъ, ондай Алтынбийкеди оьзимизге калдырайык, – деди.



Оьпкелемеймен

Кыдырап юрген Кожа Ногай шоблигинде оьзининъ эртеден аявлы досы Акболатты излеп шыгыпты экен. Терекли-Мектебке арып-талып, кеш заманда машина ман етеди эм ял алмага деп, шеттеги бир уьйде токтайды. Уьй иеси мен оннан-муннан хабарласып, Акболат досынынъ уьй аьлин, ден савлыгын сорап биледи. Соьйтип, Кожа бираз мызгап кетеди. Сонъ коьзин ашады. Караса, ярык. Саьат доьрт.

Ол тез болып Акболат уьйине йола алады. Онынъ уьйин табады эм куьрылдап уьйклап яткан досын туьртип тургыстады. Бири-бирин коьрип суьйинедилер, кушакласадылар, куваньшларыннан коькке еткендей боладылар. Аманшылыгын билген сонъ, Акболат Кожа досына маскаралап булай деп айтады:



– Мени калай эртерек тургысттынъ, досым, уйкыды боблуув аьдемнинъ шаркына кайдай зыян беретаганын билмей болаяксынъ.

– Неге билмеймен, бек аьруув де би-

лемен. Тек мен озимди сеннен де алдын туьртип уянттым, тек мен ога бир зат та айтпайман эм оьпкелемеймен, – деп Кожа ога явап береди.

Оьримли экен...

Экинши куьн Кожа аллы-ясылга баткан, орамлары тистей тизилген Терекли-Мектебтинъ ишине куваньшылы коьнъилде кайдай янъылыклар бар экен деп кыдырып шыгады. Ол бала садтынъ яныннан озганда шав-шувлы, куьлкили болып ойнап турган топар балаларды коьреди. Токтайды. Эм озине-оьзи шып-шып этип булай деп айтады:

– Меним хатыныма аьдемлер карап турып йыйы-йыйы бала табасынъ деп айтадылар. А бу балалардынъ анасы, тек коьзим тиймесин, Алла коьп коьрмесин, оннан да оьримли экен...

Аьли болса...

Кожа Ногай шоьллигиндеги Акболлатты, танысларын коьрип, олардынъ аманшылыкларын биллип, коьнъили куваньшка толып, яхшы яшавларына, баска ерлерге кыдырып шыгув деген мырат пан Кызларга карап баратаган йолга туьсип йоьнеди. Эм бир ыспайы «Волгага» шофердынъ бензин куйганын коьрип ашувы келип, булай деген:

– Бурын заманда ердинъ куьмын шыгарып, шанъын боратып, елге еткермей юретаган аргымакларга суьв иширтегаган эдилер, аьли ийисли зат иширтедилер.

Абдуразаков Казманбет.



Эл казнасы – эски соьз!

Ат тизден – йигит соьзден бел-
гили...

Эркеклик он болса, тогызы –
иллеликтир...

Бас табылса – боьрк табылар...

Боьриден корккан – кой кара-
мас...

Балады ястан уьйрет – хатын-
ды бастан уьйрет...

Соьйлер соьзинь соьзлеп айт,
Доьртте янынь коьзлеп айт...

Оьлимлерде оьлим бар –
Карс урып той этердей,
Оьлимлерде оьлим бар –
Кутырып кырга кетердей...

Кылык билмес кисиге –
Кыйын болар бу дунья,
Кылык билген кисиге –
Кыйма болар бу дунья...

*Йыйган эм баспага аьзирле-
ген А.Култаев, Махачкала.*



КУШЛИ ЮРЕТАГАН БАЪПИШЛЕР

(татар эртегиси)

1.

Бурын заманда бир туваршы болыпты. Онынъ коьп малы болган экен. Эм ога оларга карамага бек кыйын да болган. Яйылып кетсе, артыннан етпеге авыр эди. Сыйырлар карабийдайга эм тарыга ябыладылар. Койлары болса, орманлыкка карап кетедилер. Олардынъ баърисин бир ерге йыймага эм карамага керек. Туваршы бек кыйналады... Бир кере ол булай деп ойланады: «Кая, озиме бир куьшли юретаган баъпиш этип карайымшы!» Эндигиси оны этпеге де олтырады. Коьп кере кыйналады – олай да айландырады, булай да айландырады. Ызында ясайды. Ол булай баъпишлердей тувыл эди – бек куьшли юретаган болып шыкпаспа. Бир абыт этсе – авлактынъ аьне шетине етип токтайды. Тагы да бир абыт алса – авлак артта калады...

Эндигиси ога малларды бакпага енъил болды. Бир исси куьн бийик ерге олтырды эм ял алады. Ашамага да керек эди. Шешин ди. Баъпишин касына салды. Сол заман ога бир киси янасты. Саламласты. Янына келип олтырды. Эм баслады:

– Мундай коьп малы болган сен кимсинъ эм оларга кайтип карав бересинъ?

Туваршы куьлип алды эм явабын берди:

– Меним куьшли юретаган баъпишлерим бар! Бир абыт алсам-авлак артымда калады!

– Аьши сен ондай куьшли юретаган баъпишти кайдан алгансынъ? – дейди соьлеги киси ога.

– Мен оны тапканым йок, озим ясаганман. Согып эткенмен. Ети орманлыкты кыдырганман, – дейди туваршы. – Сондай бир ийги этип ясавым. Баскалар оны этип болмаслар. Олар бир заман тозбайдылар. Мени

олар йылгалардан аькетеди, калын орманнан шыгарады! Коркыныш деген зат болмас!

Соьлеги келген киси туваршыдынъ айтканын тынълайды эм ишиннен ойланады: «Мага узак кисиге бармага керек. Оннан сонъ меним баъпишлерим де тозганлар. Киймеге де онъайлы тувыллар. Оныкы болса, янъы эм берк. Куьшли де юредилер озлери! Оларды урласамша. Сонъ кашып кетермен!» Туваршы бир баска якка бурылганын карап турды. Туваршы бурылганлайын ок, озиндикин шешти эм туваршыдыкын тез болып кийип койды... Кийгени сол эди, баъпиш оны куьшли кепте алып йобнеди... Авлактан аькетти, йол ман аькетти. Ювыгы яшайтаган авылдан оьткенин де билмей калды. Ога кайтарам артына кайтпага да туьсти. Мине авыл. Мине онынъ ювыгынынъ уьйи. Тек не пайда, токтап болмайды эди. Баъпишлери алдыга карап тартадылар, тартадылар. Ювыгынынъ азбарына карап бурылганы да, сол болды, барып курыкка урынды. Коьзлериннен коьз яслары актылар! Уьйининъ азбарынынъ алдына келип йыгылды. Аяклары йогарыга караганлар. Олар йогары йыбырдайдылар, токтамайдылар эди. Оны коьрип авылдынъ балалары да йыйылып калдылар. Ога карайдылар. Тамаша этедилер. Аь киси болса тилейди:

– Аявлы, балалар! Мага коьмек этинъиз, аягымдагы баъпишти шешинъизтагы! Мен сизге каьмпет–калаш аларман, пайларман!..

2.

Сол соьзлерди эситкен балалар коьмек этпеге токтасадылар. Аякларын ыслаяк боладылар, тек этип болмайдылар. Олар токтамайдылар. Ондай куьш кайда! Аяклары ювырадылар,



ювырадылар. Балалар коьп каьрлейдилер. Сонъ баьпишти не ди бир зат этип шешедилер. Кисиди босаттылар. Ял алды эм тагы да баслады.

– Онъмаган затлар экен бу куьшли юретаган баьпишлер! Ога уьйренуьв де керек! Аь мен аьли уьйренген де йокпантагы. Коьресизбе, йыгылдым! Не аьруьв болды, сиз келип калдынъыз. Шешиндирдинъыз. Ол болмаса, не болмага да болаяк эди. Мен кайда кетип калаяк эдим...

– Аьши мундай куьшли юретаган баьпишти кайдан алгансыз, акай? – дейдилер балалар да, ога тамашалары келип.

Эр кисиге дурысын айтпага аьйип эди.

– Онда, – дейди ол, – бир туваршыдан... Алдым, тек эндигиси оьзим олардан коркаман...

Сobleги эркек куьшли юретаган баьпишлерин йип пен байлады. Йинине салды эм яав кепте ювыгына карап йобнеди. Ювыгында аьдемлер йыйылганлар эм оны саклайдылар эди. Баьриси де аьруьв кийинген. Коьнълилери де шат. Ашайдылар, юбанадылар. Йырлайдылар. Ювыгы да онынъ келгенине суйинди. Сонъ онынъ яланъ аякларына карамаспа! Тамашасы келип:

– Сен неге меним яхшылыгыма булай кепте келгенсинъ? – дейди.

Келген аьдем не деп айтсын? Дурысын айтпага уят. Сонъ баслайды:

– Баьпишлерим тар боладылар, аягымды сыгадылар...

Баьпишлерин стол астына салады. Оьзи ашайды, ишеди, шатланады. Оны ман янасып бир сары шырайлы киси олтыры эди. Баьпишлерге ол карайды эм ойланады: «Булар меним аягыма келисли экенлер!» Ол оьзининъ эски баьпишлерин аста-акырын шешти, конактыкын кийди. Баьпишлер оны алып каштылар! Столдан калай кеткенин де билмей калды! Конаклар караганша, соьлеги сары шырайлы киси йок болып калды. Ювырып бараятып ол эсикке басы ман урынып калмаспа...

Куьшли юретаган баьпишлер сары шырайлы кисиди алып барадылар... азбардан шыгардылар. Орманнан шыгардылар. Артыннан шанъ куйылады. Тавыклар онда-мунда каштылар. Баьпийлер сувга кирдилер. Балалар ян-якка шашырадылар...

Баьпиш кийген сары киси эндигиси кышкырады:

– Мага коьмек этинъыз, мени токтатынъызтагы! Токтатынъыз!

(ызы болаяк)





**1. Карасанъ ол яп-ясыл,
Тобгерек эм кобримли.
Ишин кара сен ярып –
Кызыл обзи эм табтли.**



**2. Обзин-обзи ол ашады,
Сени явып ол болады.
Тек ямгыр явып битсе –
Ол йыйылып калады.**



**3. Бир теректен баскага,
Шоршыйман эм минемен.
Эш бир заман бос болмай –
Беженим мен суьеген.**



**4. Мыйыгы бар обзининъ,
Тоны да бар алабай.
Ювып тура оз-обзин –
Тек сув тийип шыдамай!**



Ак тўрналар кўнлери

Белгили болган кепте, «Ак турналар кўнлерининг» халклар ара литературалык гамзатовлык фестивали йыл сайын ЮНЕСКО эгидасы астында оьткериледи. Быйыл ол 30-ншы кере оьткерилди. Сосы юбилейлик шарасына ортакшылык этпеге Россия Федерациясынынг язувшылар Союзынынг биринши секретари, шайир Геннадий Ивановтынг, шайир-коьширувщи язувшылар Союзынынг халклар ара ямагатынынг председатели Владимир Бояриновтынг, бир хыйлы белгили коьширувшилердинг, Сырт Кавказ Федераллык Округынинг язувшылар Союзларынынг ортакшылык этувлери коьп зат акында айтады демеге боламыз. Ол сый эм абырай савлай Дагыстанга, Расул Гамзатовка эм дагыстан литературына сий.

Энг де маьнели шарарасы 8 сентябрь кўн оьткерилди демеге керек. Бу кўн эртенги вакыт Тарки

тавындагы шайирдинг кабырына шешекейлер байламы салынды. Оннан сонг сондай шешекейлер байламы Расул Гамзатов проспектиндеги шайирдинг эстелигине де салынган. А митинг болса каладынг Ленинши комсомол паркындагы Аьскерши-босатувшыдынг эстелигининг касында оьткен.

Быйыл каладынг 50-нши номерли школасында Расул Гамзатовтынг музейи де ашылынды эм фестиваль ортакшылары онда да болдылар. Сосы школа оьзи де Расул Гамзатовтынг атын юргистеди.

Кеште Расул Гамзатов проспектиндеги Поэзия театрында аьлиги россиялык поэзиясынынг кешлиги оьткерилди. Онда келген конаклар ман бирге бизим дагыстан ерининг шайирлери де оьзлерининг ятлавларын окымага амаллы болдылар.

А.Култаев.



Куьлте туьсти, куьз келди...

Сентябрь айы куьздинь биринши, яйдынъ сонъгы айына саналады. Бир-бир тереклердинъ япыраклары саргайып баслайдылар. Куьннинъ узаклыгы кемиген сайын, шактынъ иссилиги тоьменлей береди. Коьп-коьмек коькте шак-шакта булытлардынъ суьрилген кесеклерин коьрмеге боламыз.

Явынлар да, яйда кимик, бака коьз болып явмай, увак буьртуькли болып явадылар.

Кешелер бойы кубыла карап тизилсип ушатаган турналардынъ, кыр казылардынъ уьйирлерининъ тавысларын эситпеге кыйынлы болмайды.

23-нши сентябрь куьнинде кешединъ де, куьннинъ де аьрисиннинъ узаклыгы 12 саьат болады демеге керек. Соннан сонъ болса, кешелер узак, куьндизлер кыска болып кетедилер.

23-нши сентябрьде куьз толы кепте куьшине киреди.

Сентябрь айында йыйылатаган отлар эм кыр емислери: ийтбурын, ябыскан, кышыган эм озгелери.

Куьз-коьз деген соьзден алынганы амалга келмей болмайды. Сол заман аьлемет коьркли табият коьз тийгендей болып калады дер эдик. Куьздинъ мезгили 23-нши сентябрьден алып 22-нши декабрьге дейим саналады. Куьздинъ алдындагы 40 куьнине, яьне 2 ноябрь болганшагы мезгилине, куьздинъ бай болган саны дейдилер: туьсимли, бай вакытлы дегени болады экен. Дурысы ман да, сол вакыт аьжибийдай, дуьги, юзим, бакша, ясылшалар, емислер, емлер йыйыладылар. Куьзликлерди шашув, пишенликлер, бавлар сувгарув битпеге каралады.

Сол саялы да аталардынъ айтувлары да бар: «Юз сувгарма, куьз сувгар» деген.

Куьн саьвлесин ясырган,
Сувык та келип калган.
Шоьлде кара булытлар,
Ямгырын севип алган.
Карап калдым мен ога –
Аьруьвлиги тамаша.
Карай-карай сол затка,
Эки коьзим камала.

А.Утеев.



Анадың баласына

ушынууларыннан

Балам, балам, баласы,
Балдан толган кабасы,
Суйттен толган шелеги,
Анасынын кереги.

Уйклап-уйклап,
Заьлим болсын меним кызым,
Окып-окып,
Аьлим болсын меним кызым,
Дуныяга
Маьлим болсын меним кызым!

Кызым, кызым, кызыл ала,
Кысып койган кар кора.
Тактага салар эдим,
Туьсип кетсе, увала,
Сандыкка салар эдим,
Мени коьрмей кыйнала.

Кызым, кызым, кызтана,
Кызыма келсин юз тана.
Юзеви де ак тана,
Кызым калсын мактана.

Дуьлли, дуьлли, дуьлли кыз,
Сен боларсын уьйкен кыз,
Уьйкен болып етерсинь,
Биревди уьй этерсинь.

Аруувзат аруув айлана,
Келин болсын байларга,
Кирсин отав уьйлерге,
Илсин куйрык шуьйлерге.

Аьзирлеген А.Култаев.





нинъ уыйине карап кетти.

— Бу бек яман аьдем, карашы онынъ бурнына, тамам турган биз, — деди Даут. — Баскалардынъ акында соьз айтпага уста экен. Той ман етекшилик этпеге де суйеди. Карашы сен оны, тойдынъ тоьрине барып оьзи олтырды. Тамашам келип калды. Алладынъ оьзи мундай аьдемлерди кайтип яратады экен. Мундайларга кайбир заманларда ийги куллыклар да туйсип каладылар.

Калган йолдаслар бир соьз де айтпадылар. Белки, олар Даутты яхшы таныйтаган болар эдилер. Тек Сагындык оьзининъ тамаша этувин ясырмады. «Калганларда меним куллыгым бар. Мен олар ман тойда бирге болдым. Эм олар соьлеги ястай болып, артык бир зат айтпады. Соьйлевлерине косылмады».

Сол арада экинши яс та Дауттынъ артыннан орамга карап барды. Йолдаслары ман аманласты. Энь сонъында, Даутка янасып, булай деди:

— Кобрискенше, — деп ол онынъ колын сыгып алды.

Соьлеги яс уыйине карап йол алганлай, Даут тагы да булай деп баслады;

— Бу бизим учреждениеде энь де яман аьдем. Биз куллык этпеге олтырганлай, ол, аьдетинше, оьзин бир затка санап, хабарын айтып баслар. Тойда онынъ не куллыгы бар экен. Бир такыйкадынъ оьзи тыныш олтырып болмады. Ким болса да соьз баслаганлай, ол оны токтатып, оьзининъ маслагатын этип турды. Мени де эки кере токтатты. Ама куллыкта ол мага олай этпейди. Тек аьдемлер коьп йыйылып баслаганлай, оьзин коьрсетпеге шалысар. Кыскаша айткан заманда, тек оьзин суйген аьдем.

(ызы болаяк)

*Каракалпакшадан коьширген
С.Култаева.*



Соколёнок

Лашын

5/2016

сентябрь - октябрь

Иллюстрированный детский журнал.
Издается один раз в два месяца.

Учредитель :
Правительство Республики Дагестан

Журнал зарегистрирован федеральной
службой по надзору в сфере связи и
массовых коммуникаций.
Регистр. номер ПИ №ТУ5-0018
от 21 мая 2009 г.

Издается с января 1990 г.

Главный редактор
Мурад Ахмедов

Редколлегия:
А.Исмаилов (зам. гл. редактора)
Т.Зургалова (отв. секретарь)
А.Култаев
Б.Кулунчакова
М.Авезов
С. Майлыбаева
С. Култаева (редактор выпуска)

Худ. редактор З.Даганов
Тех.редактор Т. Лузина
Художник номера А. Самарская
Оформление обложки А. Качаев

Выход в свет 22.10.2016 г.
Тираж 152 экз.
Заказ №331

Типография: ООО «Издательство «Феникс
пресс»
Адрес типографии: 367018, РД, г. Махачкала,
ул. Петра I, 61.

Редакция и издатель: Государственное
бюджетное учреждение Республики
Дагестан «Редакция республиканских
литературных журналов «Соколенок» и
«Литературный Дагестан».

Адрес редакции и издателя: 367025,
РД, г. Махачкала, ул. Даниялова, 55.

Ногайский язык.
Индекс: на год - 63238,
на полугодие - 78432.

Цена свободная.